

दिनांक 18.03.2024
समय: 18.50 बजे

आकाशवाणी जयपुर—अजमेर
प्रादेशिक समाचार

- सुप्रीम कोर्ट भारतीय स्टेट बैंक ने चुनावी बॉन्ड ऊं जुड़ी सगळी जाणकारियां देवण रा हुकम दीना।
- प्रदेश मांय चुनाव आदर्श आचार संहिता री पालना करावण सारू पुलिस नाकाबंदी तेज कीनी—थाणां मांय लाईसेन्सी हथियार जमा करावण रो काम सरू व्हयो।
- स्टार्टअप महाकुंभ आज नई दिल्ली मांय सरू व्हयो।

अर

- जयपुर ग्रामीण जिला रा चंदवाजी थाना हलका मांय व्ह्या सडक हादसा मांय चार जणां री मौत।

000

सुप्रीम कोर्ट भारतीय स्टेट बैंक—एसबीआई ने चुनावी बॉन्ड ऊं जुड़ी सगळी जाणकारियां देवण रा हुकम दीना है। मुख्य न्यायाधीश न्यायमूर्ति डी.वाई. चंद्रचूड़ री सदरत वाळी पांच सदस्यां री संविधान पीठ एस.बी.आई. ने 21 मार्च तांई अ बॉण्ड खरीदी करण वाळा अर बॉन्ड री रकम हासिल करण वाळी सियासी पार्टी बीचे सम्पर्क बतावण वाळा यूनिक बॉन्ड नंबर री जाणकारी देवण सारू कहयो। सुप्रीम कोर्ट एसबीआई रा अध्यक्ष ने 21 मार्च सिंज्या 5 बज्या तांई अदालत सामी बॉन्ड ऊं जुड़ी सगळी जाणकारियां बतावण रो हलफनामो दाखिल करण रा हुकम दीना है।

000

लोकसभा चुनाव ने ध्यान राखता थकां प्रदेश रा न्यारा—न्यारा जिलां मांय पुलिस अर प्रशासन पूरी सावचेती सागे काम कर रह्या है। जिला निर्वाचन अधिकारी बैठकां राख र चुनाव सही तरीका ऊं करावण रा सगळा जतन कर रह्या है। भीलवाडा रा निर्वाचन

अधिकारी नमित मेहता चुनाव ऊं जुड्या अहलकारां री मीटिंग ले र चुनाव आदर्श आचार संहिता री पालना तैय करावण रा बारा मांय चर्चा कीनी। वे भीलवाडा लोकसभा हलका रा सगळा मतदातावां ऊं 26 अप्रैल ने वोट जरूर देवण री अपील कीनी।

अजमेर मांय पुलिस लाइसेंसशुदा हथियार पुलिस थाणां मांय जमा करणो सरू कर दीनो है। एस.पी. ई बाबत सगळा थाना अधिकारियां ने हथियार जमा करण बाबत हुकम दीना है।

जिला मांय हाल ताई डोढ हजार ऊं बत्ती रिवाल्वर, पिस्तौलां अर बंदूकां पुलिस थाणा मांय जमा करायी जा चुकी है। वे बतायो के बैंक, औद्योगिक संस्थानां अर संवेदनशील संस्थावां ने जारी करी ज्या हथियारां ने छोड़बा रो फैसलो लेवण सारू एक समिति बनायी ज्यी है। ई बीच, पुलिस खास गेलां माथे नाकाबंदी कर र मोटर-गाडियां री तलाशी ले रही है अर न्यारा न्यारा थाणा हलका मांय फ्लैग मार्च कर्या जा रह्या है। डूंगरपुर मांय पुलिस गुजरात री सरहद ऊं लाग्योडी सात ठोडां नाकाबंदी कर र जांच सरू कर दीनी है। पेश है म्हाणा खबरनवीस री रपट—

चूरू जिला रा रतनगढ़ मांय पुलिस रोडवेज री एक बस री तलाशी ले र 21 किलोग्राम चांदी रा बर्तन बरामद कीना। बस सरदार शहर ऊं कोटा जा रही ही।

000

प्रदेश मांय चुनाव मांय मतदातावां री बत्ती ऊं बत्ती भागीदारी तैय करण सारू चलायी जा रही स्वीप गतिविधियां रा तैत न्यारा-न्यारा कार्यक्रम राख्या जा रह्या है। उदयपुर मांय फतेहपुरा री एक होटल मांय रंगोथान-5 कार्यक्रम राख्यी ज्यो, जिण मांय अढाई हजार ऊं बत्ता लोग शिरकत कीनी। कार्यक्रम मांय जिला समन्वयक वोटर हेल्पलाइन एप, सक्षम एप, सी विजिल एप, केवाईसी ऐप अर नुवा नाम मंडावण रा बारा मांय जाणकारी दीनी।

उदयपुर शहर रा वार्ड नंबर 56 मांय मतदाता वोटर हेल्पलाइन ऐप रे मार्फत वोटरलिस्टां मांय नाम री जांच कीनी अर हटायी ज्या नाम ओजू जुडायी ज्या। बालोतरा मांय आज महिला अर बाल विकास विभाग री ओर ऊं मतदाता जागरूकता रैली निकाळी ज्यी। ई दौरान आंगनबाड़ी कार्यकर्ता वोट जरूर देवण री अपील कीनी।

000

जयपुर मांय भाजपा रा प्रदेश कार्यालय मांय न्यारी न्यारी सियासी पार्टियां रा पैली वाळा विधायक, विधानसभा चुनाव मांय उम्मीदवार रह्या लोग, जिला परिषद रा सदस्य अर पंचायत समिति रा सदस्यां सागे सरपंच अर 36 ऊं बत्ता नेता भाजपा मांय भेळा व्हे ग्या। ई मौके जालौर रा पैली वाळा विधायक रामलाल मेघवाल, देवली-उनियारा विधानसभा सीट ऊं आरएलपी रा उम्मीदवार रा तौर ऊं चुनाव लड्या डॉ. विक्रम सिंह गुर्जर, एससी प्रकोष्ठ जालौर रा जिलाध्यक्ष गोकुल परिहार, जालौर जिला कांग्रेस कमेटी रा पैली वाळा महामंत्री रमेश मेघवाल, समाज कल्याण बोर्ड री पैली वाळी सदस्य भावना गर्ग अर फैशन डिजाइनर अर्चना सुराणा समेत केई नेतावां ने ज्वाइनिंग कमेटी रा अध्यक्ष अरुण चतुर्वेदी अर भाजपा रा प्रदेश उपाध्यक्ष नारायण पंचारिया अर दूजा नेतावां री मौजूदगी मांय भाजपा री सदस्यता दिराई ज्यी।

000

लोकसभा चुनाव मांय वोट देवण बाबत् जाग जगावण सारु आकाशवाणी समाचार जयपुर री ओर ऊं संदेश श्रृंखला सारु करी ज्यी है। आप संदेश रिकॉर्ड कर र या टाइप कर र म्हाणा व्हॉट्सअप नम्बर 94140-52368 माथे भेज सको हो। चुणी ज्या संदेश म्हाणा न्यारा-न्यारा समाचार बुलेटिन मांय भेळा कर्या जावेला। आज पेश है हनुमानगढ़ जिला रा रेवतराम सुथार रो संदेश –

000

नई दिल्ली मांय आज स्टार्टअप महाकुंभ सारु व्हयो। 20 मार्च तांई चालण वाळा ई आयोजन मांय एआई, बीटूबी, एग्रीटेक, डीपटेक, क्लाईमेट टेक, गेमिंग, ई-स्पोर्ट्स अर फिनटेक सरीखा न्यारा-न्यारा मुद्दां माथे पवेलियन बणायी ज्या है। ई महाकुंभ रो मकसद सेठां अर निवेशकां ने भारत मांय कारोबार सागे जोडणो है। उद्योग संवर्धन अर आंतरिक व्यापार विभाग – डीपीआईआईटी रा सचिव राजेश कुमार सिंह कह्यो के भारत दुनिया मांय तीजो मोटो स्टार्टअप तंत्र वाळो देश है अर नुवा स्टार्टअप री फहरिश्त मांय मोटी

तादाद मांय नाम जुड रह्या है। स्टार्टअप महाकुंभ मांय दो हजार ऊं बत्ता स्टार्टअप, मोटी तादाद मांय निवेशक समेत न्यारा—न्यारा नुमाइंदा शिरकत कर रह्या है।

000

जयपुर ग्रामीण जिला रा चंदवाजी थाना हलका मांय आज संवारे दिल्ली—अजमेर हाईवे माथे एक बेकाबू कार सड़क माथे ऊबा ट्रेलर ऊं टकरा गयी। हादसा रे कारण कार मांय सवार चार जणा री मौत व्हे गयी अर तीन जणा घणा जख्मी व्हे ग्या। चंदवाजी रा थाना अधिकारी सुगन सिंह राठौड़ बतायो के सेवड माता मिन्दर कने ऊबा एक खराब व्ह्या ट्रेलर ऊं शाहपुरा री ओर ऊं आ रही कार टकरा गयी। वे बतायो के मरण वाळा अर जख्मी लोग रिश्तेदार है। अ सगळा बुटाटी धाम रा दर्शन करण सारू ग्या हा। कोटा जिला रा दीगोद थाणा हलका मांय ई अणजाण मोटर गाड़ी री टक्कर ऊं मोटरसाईकिल सवार एक जणा री मौत व्हे गयी।

000

अजमेर रा मदार रेलवे टेशन कने एक सुपरफास्ट रेलगाड़ी रा इंजन अर चार डिब्बा पटरी ऊं उतर जावण ऊं रेलों री रूक्योडी आवण—जावण ओजू सरू व्हे गयी है। उत्तर पश्चिम रेलवे रा मुख्य जनसंपर्क अधिकारी कैप्टन शशिकिरण बतायो के राहत रा काम चाल रह्या है अर अप अर डाउन दोन्यू लेणां माथे गाड़ियां री आवण—जावण ओजू सरू व्हे गयी है। वे बतायो के हादसा रे कारण छह गाड़ियां रद्द करीजी है, आठ गाड़ियां आंशिक तौर ऊं रद्द करी ज्यी है, जदके कुछ गाड़ियां दूजा गेलां ऊं चलायी जा रही है। ई बीचे उत्तर पश्चिम रेलवे रा महाप्रबंधक अमिताभ कह्यो के हादसा री जांच सरू कर दीरीजी है।

000

डीग जिला मांय काल ऊं तीन दिन रो ब्रज होली महोत्सव सरू व्हेला। महोत्सव रा तैत मेला मैदान मांय न्यारी—न्यारी होडां राखी जावेला। डीग महल मांय मेहंदी, रंगोली अर मूछ होडां राखी जावेला। सिंज्यां री पोर रंग—रंगीला फव्वारा चलाया जावेला अर बृज अर राजस्थानी कलाकार लोक नृत्य पेश करेला। ई सागे ई मुंबई रा कलाकारां री ओर ऊं गायन रो कार्यक्रम पेश कर्यो जावेला। गुलाल होली, कुंज गुलाल होली, दूध दही अर लड्डू होली सागे लट्ठमार होळी खेली जावेला अर शोभा यात्रा निकाळ र ब्रज री छटा बिखेरी

जावेला। म्हाणा भरतपुर खबरनवीस बतायो के वटै फागोत्सव री जोरदार हलचल व्हे रही है।

ई बीचे भीलवाड़ा कने शाहपुरा मांय फूलडोल महोत्सव 20 मार्च ऊं सरू व्हेला। पैला दिन ग्यारस रे मौके थाल री शोभायात्रा निकाळी जावेला। पांच दिन रो ओ महोत्सव खास तौर ऊं 25 मार्च ऊं सरू व्हेला।

000

लोकसभा चुनाव ने ध्यान राखता थकां प्रदेश मांय ई वोटर लिस्टां मांय नाम जोडबा रो काम चाल रह्यो है। चुनाव सारू पर्चा दाखिल करण री आखिरी तारीख ऊं दस दिन पैली तांई वोटरलिस्टां अपडेट करी जावेला। मुख्य निर्वाचन अधिकारी प्रवीण गुप्ता बतायो के वोट देवण रा पात्र लोग वोटर लिस्टां मांय नाम जुडावण सारू निर्वाचन आयोग रा मतदाता सेवा पोर्टल, मतदाता हेल्पलाइन एप अर बीएलओ एप काम ले सके है। ध्यान जोग है के प्रदेश मांय लोकसभा चुनाव सारू दो दौर मांय 19 अप्रैल अर 26 अप्रैल ने वोट पडेला।

000